



Kabarett „Sachsenmeyer & Co.“  
09224 Chemnitz  
Feenweg 11

Hauptspielstätte:  
Kabarett-Kiste (im Hedwigshof)  
An der Markthalle 8  
09111 Chemnitz

Bestell-Telefon: 0371 - 694 77 11  
[www.sachsenmeyer-kabarett.de](http://www.sachsenmeyer-kabarett.de)  
e-Mail: sachsenmeyer@t-online.de

**48. Kalenderwoche – ab 29. November 2009**

## Saunamuseum

Mir ham ja werglisch in Gemnidz eene ganze Mänge von Museeums - e Indusdriemuseeum un ooch das von dähm Gunznhausor un un un...! In die Museeums kannsde ehm rischdisch neingehn un drinne rumloofn un dir alles anguggn - wie sisch das ehm geheern dud fiehr Museeums.

Nu ham mir abor ooch in Gemnidz e Museeum, das duds bloß im Indornedz gähm. Ja, das is bloß firrduell! Das is e Museeum ibor Saunas un so. Saunamuseeum!

Firrduell, das is, wens was gahr nisch werglisch gähm dud, sondorn ehm bloß im Indornedz. Dor Eingang zum Sauna-Museeum is eenfach zu finden - da mussde bloß [www.saunamuseum.info](http://www.saunamuseum.info) eingähm in dein Gombjudor un schon bisde drinne.

Un wennde eene Fladdrade hasd, dann dud disch das ooch nischd weidor kosdn. Nu kannsde in dähm Museeum rumschlürfn wie de willsd. Gligg, gligg, gligg un schon bisde währ weeiß wo! Un du mussd keene Filzbandoffln anzieh'n odor so was. Is ja klar. Alles bloß firrduell!

Indressand is abor dann zum Beischbiel ooch, wies dazumals in dor ehemalischn gewähsn is. Isch meene jedzde - dazumals in Unsoror Deudschn Demogradischn Reublig! Dazumals war ja nisch bloß Saunabaun eene Sache fiehr sisch. Ooch Garasche baun war dursch de Vorsorschungsengbässe sähr erschwähd. Odor Eischnheim uns so. Abor ehm ooch Sauna!

Wobei Sauna fiehr brivad ooch wie e bißl e Lugsus gewähsn is. De Bardei had nisch ausdrigglich off dähm Bau von indeviduelle Saunas orijendierd. In dor Haubdooffgabe von Wirtschafds un

Sozialbolledig schdand nischd von Sauna un so drinne. Un wenn de dir eene hasd baun wolln, gabs ooch keen zinslosn Kredit.

Off dor annorn Seide is abor Saunabaun nisch direggd als schdaadsfeindlich eingeschdufd wordn. Villeischd ehm ooch, weil de Freinde aus dor Soffjedunjon solsche großn Saunafreinde warn un bis heide sinn. Ja, de Russn un de Finn sinn ja de greeßdn Saunafenns, wo gähm dud!

Jednfalls - de Schdasi had Saunabauor eischendlich im Großn nun Ganzn in Ruhe gelassn. Isch meene, eene Sauna had ja ooch nur in ganz seldne Fälle als Hilfsmiddl zur Reubligfluchd gediend. Heeschdens so firrduell. So im Geisde had sisch villeischd dor eene odor dor annre beim Sauniern von dor Hidze davondrachn lassn in siedliche Gefilde. Nach Affriga odor off de Mallediefn.

Nee, de Sauna is schon immor mähr e Ord fiehr de Fluchd nach inne gewähsn. E Ord fiehr de innore Besinnung un Endschbannung. Ooch fiehr Endschlagung un fiehr de Gesundheit.

In dähm Saunamuseum im Indornedz is ooch de kleensde Sauna drinne, die wo jemals gegähm had! Also, als Fodo. Die Minnisauna is wie in eim Schrank drinne gewähsn. Eene absolute Einmann-Sauna. Odor ooch Einfrau-Sauna. Abor fiehr edwas schdämmischore Diebn war die beschdimmd nisch geeischned. Dor Rainor Galmund zum Beischbiel - dähm häddesde villeisch mid Miede un Nod neingegrishd, abor nisch widdor raus!

**Eduard Sachsenmeyer**